


■ COLUMNA

Guerra e pasch

DA GIUSEP NAY

Legend LQ dal venderdi passà è l'ovra monumentalada da Leo Tolstoi «Guerra e pasch» vegnida endament a mi. Quella tracta bain dal temp suenter ils eveniments enturn il general Alexander Suworow en Svizra, ils quals Dumeni Columberg lai reviver. Ella mussa dentant in patratgar guerril che fa sgarschur e nua che pasch è sulettamain in resultat da guerra.

Alexander Suworow è daventà in erox malgrà sia guerra manada senza nizz cun millis schuldata morta. La dumonda, daco che quai è pussaivel, resta en tut ils bliers rapports sur sia «conquista» da set pass en Svizra sut cundiziuns invernals – per betg dir infernals – senza ina risposta. Il medem vala per senn e legitimaziun d'ina commemoraziun regulara da quella «conquista» en ina «enclava russa», quai che vul dir sin territori russ en Svizra. Gliez – la dumonda da la valaivladad d'ina vaira enclava anc oz, lain laschar qua averta – insinuescha ch'il general russ haja la finala conquistà ina part da noss sontg Gottard. I para che erox han tut ils dretgs, han adina raschun ed èn da suandar en mintga cas en fin la mort, ed apparentamain disturba ni l'in ni l'auter. Ma tge, sch'ina tala tenuta duess valair anc oz envers tals che vulan daven-tar erox sco in president vi sur mar u quel da la Russia?



Da tge sa tract'ì tar il postulat da cuss. naz. Silva Semadeni, il qual pretenda in rapport dal cussegl federal sur la situaziun da nossas duas linguas da minoritad, pia er dal rumantsch? Quels che han l'intenziun zuppada da cumbatter il rumantsch grischun en tuts graus teman ch'ins veglia far cun quel postulat il medem sco els fan – in fatg d'observar betg mo tar els – numnadamain che quel haja l'intenziun zuppada da promover il rumantsch grischun. Ussa stat en il protocol dal cussegl nazional la decleraziun da la postulanta: «con il rapporto non si intende... fomentare conflitti sul Rumantsch Grischun». Cun quai haja er el savì dir gea al postulat, ha cuss. naz. Martin Candinas ditg envers LQ, quai essend ch'il postulat «n'empovia betg d'introducìr sfurzadamain il rumantsch grischun». Tge fiss dentant da tegnair d'in rapport sche quai vules dir – sco quai ch'ins sto chapir sia decleraziun or dal context – che quel na duaja betg astgar intercurir senza restricziuns era la situaziun dal rumantsch grischun e sia

muntada per il mantegniment dal rumantsch? Nagut! E tge, sch'il rapport vegn tar il resultat ch'il rumantsch grischun è da promover, essend ch'ina avischinaziun dals idioms ed uschia ina vaira unitad da la Rumantschia dovra ina lingua unifitgada a l'interiur sco envers l'exteriur? Il rapport vegn alura bain a savair vegnir sbittà, cun dir ch'ins n'haja gist betg vulì quai. E tge ha tut quai plinavant da far cun betg divider Rumantschas e Rumantschs giu a Berna, sch'ins vul sez suandar là be las temas dals ins? Mia resposta è che quai ha da far pli blier cun guerra che cun pasch.

Ala fin è anc da chattar en la columna da l'ediziun numnada da LQ la proposta d'in schlet armistizi. Il secret da banca na tutga segiramain betg en nossa Constituziun federala. Daco ch'ins na duai, per impedir quai, betg refundar il dretg fiscal penal, uschia che fraud fiscal sa vegnir impedì er ozendi efficaciamain, quai è il secret dal cuss. dal chantuns Martin Schmid. In schurmetg cun in secret da banca er là, nua ch'i sa tracta da scuvrir defraudaziun da taglia n'è da tutfatg betg giustifitgà. Vulair mantegnair vinavant mancanzas dal dretg fiscal che offreschan anc quel schurmetg, per betg stuair manar la guerra encunter in secret da banca sco in principi costituzional da nossa Svizra n'è nagina vaira pasch.